

Seni Grasio unggul lagi... buat tahun ke-9

► ANWAR YAHYA
anwar@sph.com.sg

BUAT tahun kesembilan berturut-turut, Perguruan Silat Seni Grasio berjaya mempertahankan gelaran mereka sebagai juara keseluruhan Kejohanan Pencak Silat Nasional Ke-41 yang berlangsung baru-baru ini.

Seni Grasio membuktikan kehandalan mereka apabila menamatkan saingan dengan 49 pingat emas, 24 perak dan 14 gangsa – mengatasi Perguruan Sendeng Belalang Singapura yang terpaksa berpuas hati dengan tempat kedua dengan 13 emas, 22 perak dan enam gangsa.

Tempat ketiga pula diduduki Perguruan Silat Seligi Tunggal Angkatan Singapura yang mengumpulkan tujuh emas, 16 perak dan 23 gangsa.

Menampilkan sekitar 529 peserta – ada di kalangnya semua 10 tahun – yang terdiri daripada 16 perguruan dari serata negara, kejohanan nasional kali ini berlangsung lebih meriah dan gah, apatah lagi ia dianjurkan buat julung-julung kalinya di Auditorium Masyarakat, Hab Tampines Kita, yang serba baru dan gah.

Auditorium yang lebih besar itu turut menyaksikan Persekutuan Silat Singapura (Persisi) menyediakan sehingga enam gelanggang yang dapat

menyajikan enam pertandingan secara serentak – membolehkan edisi kejohanan tahunan ini diselesaikan dalam satu hujung minggu, dan bukan sehingga dua hujung minggu pada tahun-tahun yang lalu.

Pesilat Seni Grasio, Nurzuhairah Mohammad Yazid, pula telah dinobatkan Anugerah Pesilat Terbaik (Kategori Senior) sepanjang kejohanan kali ini.

Kejohanan turut diserikan kehadiran dua tetamu terhormat – Setiausaha Parlimen (Kebudayaan, Masyarakat dan Belia), Encik Baey Yam Keng, yang hadir pada hari pembukaan acara dan Menteri Sekitaran dan Sumber Air, Encik Masagos Zulkifli Masagos Mohamad, menyampaikan hadiah kepada para pemenang di upacara penutup.

Turut menyerikan kejohanan ialah penampilan khas Menteri Kebudayaan, Masyarakat dan Belia, Cik Grace Fu.

Mengulas kejayaan kejohanan itu, Ketua Pegawai Eksekutif (CEO) Persisi, Sheikh Alau'ddin Yacoob Marican, melahirkan rasa puas hati dengan prestasi yang dipamerkan pesilat-pesilat elit nasional sambil menyatakan matlamat meningkatkan lagi kesedaran umum terutama di kalangan golongan muda mengenai seni mempertahankan diri tradisional itu telah berjaya dicapai.

NAIB JUARA: Pegawai dan pesilat Perguruan Sendeng Belalang Singapura merayakan kejayaan sebagai naib juara keseluruhan.



RAMAH MESRA: Cik Fu beramah dengan tiga srikandi muda kejohanan kali ini.

DIKTIRAF: Pemenang Anugerah Pesilat Terbaik (Kategori Senior), Nurzuhairah Mohammad Yazid, dari Seni Grasio bergambar dengan tetamu terhormat, Encik Masagos, dan presiden Persisi, Encik Mohd Yasrin Mohd Yasil (kiri).